

Laux Doengzhag Gwn Cazhaet

□ Dahlajcax Lwgndoengcoengz

Heuh doengzhag guh laux doengzhag, neix gangmingz bang doengzhag neix caen dwg geq lo. Gyoengqde dwg guek raeuz fuk gauhgaug ma laeng daih daihngeih daihhagseng, 50 boux vunz gungh aen ban ndeu, seizneix dingzlai boux gaeng duiyoh, cij miz gou caeuq 5 boux doengzhag lij hwnjban, 5 boux dou dwg dangbi gauhcungh bizyez couh gauj ndaej daihhag, hix yaek daengz nienzgeij duiyoh lo. Bang vunz laux 60 bi baedauq neix, gyanghaet romhriz couh daeuj daengz aen diemqcazsingz Namzningz doxcomz gwn cazhaet, siengj mbouj daengz lij ndaej gangj.

Ndwenggoenz gvaqbae yudyud, aen naj gaengq bienq geq, cij miz gij singq bouxvunz nanz gajbienq.

Bide, boux doengzhag ninz youq doiqnaj congz gou haenx, Youq moux aen cunghyangh giyez dang gvaq bangunghsiz cujyin. Miz baez ndeu, gou bae banggunghsiz de youz, raen boux doengzhag caeuq gou doxdoengz dwg vunz lajmbanj neix, guh saeh suenq ceiq ndei lo: De cingq sij saw ciem vwnzgen, raen de sij geij aen cih “soengq lingjdauj baevah” neix, lumj cih boux suhfazgyah raixcaix, gij cih baenzneix gyaunde, bouxlawz yawjraen le cungj rox maij! Saeh iq de cungj guh ndaej baenzneix ndei, saeh hung couh engqgya mbouj yungh gangj lo.

Boux doengzhag neix youq mwh doeg daihhag couh lienh sij cih lo, geijcib bi daeuj mbouj dingz gvaq. Gwn cazhaet gaxgonq, de soengq hawj moix boux doengzhag gaiq beizdoeb ndeu, gwnz beix miz sei de sij haenx. De gangj vahriu naeuz: “Neix dwg gij doxgaiq youq mwh ngoenzndat dajcaemx le daenj vaqgeh gip yungh.” Dou cix ndawsim cungj rox: Neix dwg faenh cingzeiq doengzhag ndeu! Cih de mbouj beij cih suhfazgyah yaez, cij dwg de mbouj mizmingz, mbounjex hix dwg aen cih dij cien maenz.

Bide boux doengzhag ninz youq baihsuwx congz gou haenx, youq ndaw yangh, ndaw yienh guh daeuz gvaq, doeklaeng diuq daeuj giheiz danhveih guh boux daeuz iq ndeu, de ceiq maij gangj vahaeunaj,

mingzmingz rox dwg laux doengzhag, de cix haep bak hai bak “xx cangj” “xx gyausou”, hawj vunz daej riu mbouj ndaej. Gizsaed, duiyoh le, dang maz guen guh maz hak cungj dwg saeh gaxgonq lo. Gou yungh coenz vah ndeu daeuj gangjriu naeuz: Mboujlwnh dou nyuenz dwg vunz maz, seizneix cungj bienqbaenz bouxlaux lo.

“Siujbanh gyausou caen dwg ban raeuz boux ceiq coz ceiq miz dungxcaiz ha!” Cungj yaek duiyoh lo, boux daeggo neix lij mbouj lumz dauq neix, daihgya dingq le cungj riuhaha hwnjdaeuj.

Daihgya roxnyinh ceiq gvaqyinx dwg dingq song boux doengzhag doxcengq lajneix haenx.

Boux doengzhag ndeu gaengq duiyoh 5 bi lo, de ciengzseiz bae ndaw Nanzhuz Gunghyenz byaij, seiz mbouj seiz caeuq geij bouxlaux duiyoh haenx gangj saeh hung guekgya. Gyoengqde ceiq gvansim gij saeh dwg gyaqcienz ranz, laihaeuz guekgya dingh naeuz “ranz dwg aeu daeuj youq”, gyaq ranz gig vaiq couh doek roengzdaeuj lo.

Siengj mbouj daengz, vah neix baez gangj okdaeuj, sikhaek miz boux doengzhag gyausou ndeu fanjdoiq ndaej gig haengq.

Yenzlaiz, song boux de dwg doiq “ien’ gya” ndeu, youq mwh doeg daihhag, song boux couh ciengzseiz vih gij saeh boux naeuz dwg caenleix haenx doxceng dwk naj nding rwz dit. Miz baez ndeu, song boux de doxceng gij vahdaeuz dwg: Daengz ngoenz ndaej saedyienh “4 aen yendaiva”, aeu mbouj aeu yungh gim daeuj guh aen boiswiqbak. Boux ndeu naeuz aeu gim daeuj guh sai ngaenz lai, boux ndeu naeuz neix dwg beijgangj ndwi, dwg siuhswz soujfaz. Daj mbouj doengz gakdoh daeuj gangj, song boux gangj ndaej cungj mbouj loek, hoeng gyoengqde cix itdingh aeu ceng ok sang daemq saw hingz.

40 bi gvaqbae, naj gaengq bienq nyaeuq, byoem gaengq bienq hau, song boux raennaj lij aeu doxceng doxdingj: Boux ndeu naeuz, song bi doxndaw, gyaq



ranz yaek doekroengz, boux ndeu naeuz, gangj song bi seizgan gangj ndaej goengq lai, aiq dwg song bi lingz geij ndwen ne?

Nanzgvaiq naeuz bouxlaux lumj lwgnyez, caenhguenj gyoengqde dwg doxceng mbouj dwg doxndaq, hoeng danghnaeuz mbouj ra aen mbaeklae ndeu, song boux lwgnyez hung neix bouxlawz hix roengz mbouj ndaej daiz daeuj. Yienghneix miz vunz dizyi: Hawj song boux de aen gihvei doxceng goengbingz ndeu—— boux daeggo A hingz, daeggo B couh cingj vunzlai gwn cazhaet; daeggo B hingz, couh hawj daeggo A cingj hek.

Mboujguenj byawz saw byawz hingz, dou dwg bouxhenz cungj dwg boux ndaej hingz, song bi gvaqlaeng youh miz cazhaet gwn lo.

Gwn cazhaet yaek sat, boux doengzhag yenzlaiz youq bumwnz guh hong youqgaenj ndeu guh cungjgez naeuz: Ngoenzneix, gyoengq doengzhag youq ndaw heiqfaenh ndatfoedfoed neix gyauliuz gij yawjgap doiq guekgya ginghei caeuq lwgminz gaendaenj, yienh’ok gyoengqraeuz lij nomj caengz geq, doengzhag gamjcingz ciengxlwenx naekna mbouj bienq, neix dwg baez gwn cazhaet doxgiet cinbu ndeu.

Youq daihgya sim’ angq vahriu neix, baez gwn cazhaet neix sat lo.

•Sawcuenhvaez Lwgnyez•

Gij Golwgnyez Henz Dahhoengz

□ Lanz Haijyangz Moz Beibei / 蓝海洋 莫蓓蓓

“Doenghvaez——miz saek cib-geij bi loba, seizhaenx mwngz lij caengz okseng ne!”

“Gvaiq mbouj ndaej gou mbouj rox.”

“Seizhaenx miz boux dahmbwk he, maj ndaej gig lengj, gya’ gyawj gak mbanj daegmbauq ranz miz di ngaenz, cungj dak mehmoiz bae ranz de guhmoiz. Ndawde miz boux daegmbauq he, ranz de mbouj miz ngaenz geijlai, cij miz boux daxmeh he——”

“Boh de ne?”

“Dai lo, dingqgangj deng caeggeq ndaw bya goenjcuq gaj dai lo.”

“Dwg bang caeggeq youq gwnz Byayauz?”

“Lauheiq dwg.” Daxdaiq hix-naengz dawz ceijdwkfeiz gab youq gij fa hab’ien, gou doq bae coux gvaq doengzien cuengq youq gwnz

daizcaet.

“Daiq, mwngz gangj roengzbae ha!”

“Dwg mwngz dajduenh gij vah gou ne.”

“Gou caiq hix mbouj oksing lo.”

“Boux daegmbauq lauheiq hix gya’z boux dahmbwk haenx, couh gag ndwet hwnjdaeuj lo—— W, maz heuhguh gag ndwet, mwngz rox lwi?”

Gou mbouj nyienh caiq dajduenh gij vah daiq gangj, cij ngaekgyaeuj dwddwd.

“De hix dak vunz bae ranz dahsau haenx cammoiz, hoeng bohme h ranz dahsau haenx cungj siengj ra boux lwggwiz ranz miz cienz, ndigah yawj mbouj hwnj de. De couh dauqcawq lwnh hawj gyoengqvunz, danghnaeuz ciuh vunz neix aeu mbouj ndaej dahsau neix guh yah, couh yaek

bae guh hozsiengh. Bohme dahsau neix dingq le gij vah neix, engq mbouj leixlangh de lo, doeklaeng couh haq dahlwg hawj boux mbauq ranz gig miz cienz he.”

“Ha!” Gou youh lumz lo, nyaenx mbouj ndaej youh haibak dajduenh gij vah daxdaiq. “Baenzneix, de bae guh hozsiengh lwi?”

“Danghnaeuz de caen bae guh hozsiengh cixbah.”

“Vihmaz?”

“Aenvih de —— W, haxbaenh gou gangj daengz gyawz lo? …… W, gou gangj daengz dahsau haenx doeklaeng haq hawj daegmbauq ranz bouxmiz, ngoenz doxaeu gig nauhyied! Youq bakdou hung baij heiqdaiz ciengq heiq ndaej sam hwnz sam ngoenz, daizlaeuj baiz daengz haw bae. De gig siengsim, hoeng mbouj

wnggai gya’uq baez ndat couh hwnj bya bae.”

“Dwg bae guh hozsiengh lwi?”

“Dingqnaeuz hwnj bya bae guh caeggeq lo.”

“O? Baenzlawz rox?”

“Aenvih song bi le, de sawqmwh youh dauqma lo.”

“De gag gangj okdaeuj?”

“Beij de gag naeuz lij caen.”

Lwgda daxdaiq sawqmwh byaengq ndaej gig hung, fwf gikdoengh hwnj-daeuj: “Ngoenzde gyanghwnz, de couh yinx caeggeq haeuj mbanj daeuj, gaemh gvan dahsau haenx bae.”

“Bemx. Byawz hawj de aeu boux dahsau gyaunde haenx guh yah.” Gou daegbied doengzcingz daegmbauq ranz gungz haenx, dingq daengz gizneix, gou lumjnaeuz roxnyinh cungj angqyangz boizhaemz gvaq.

“Baenzlawz ndaej yienghneix gangj?” Daiq hat gou, mbouj doengz-eiq gij yawjgap gou, bibi gya’uq, gyangznaek mbat le naeuz: “De hix daiq simdoeg lo, ciengjgiep le geij ranz bae, lij goenjcuq daegmbauq ranz bouxmiz haenx bae lo.”

(caengz sat)